

Nos hendenan special

Frankie Kuiperi:

DESDE HOBEN, DEPORTE TA SU FUERTE, SPECIALMENTE KARATE!

Redacta pa : Mercedes Abdul

Famia ta un pilar den tur comunidad

E invitado awe pa nos espacio "Nos Hendenan Special" ta Sr. Frankie Kuiperi, sub-director di Arubus, kende ta un persona hopi activo den deporte y ademas ta envolvi den dos organizacion social. Frankie Kuiperi ta kere firmemente den e institucion di famia, specialmente pa estabilidad moral y emocional di e yunan. Pe, famia ta keda un pilar den tur comunidad.

ESTUDIO

Frankie a haci su enseñanza basico na Dominican College; a pasa su educacion secundario na La Salle College; a bay Colegio Arubano, y despues a sigui hopi curso den management y computacion.

"Mi a purba bay studia na Venezuela, pero mi mayornan a prefera pa mi keda studia na Aruba mes. Esey ta e motivo pa cual mi a bay Colegio Arubano despues di La Salle".

Sin embargo Frankie Kuiperi a sigui cursonan di deporte den exterior, ya cu deporte ta su linea fuerte.

TRABAO

Frankie Kuiperi a cuminza traha cu apenas 17 aña di edad, ora el a caba Colegio.

"Mi a cuminza traha cu e agencia di biahe di mi tata, despues mi a bay traha cu Mc.Kee na Lago, y posteriormente mi a dedica hopi na karate y den e ramo aki mi a tuma un curso na Estados Unidos, den Police Defensive; mi a bay studia na Japon, y ora mi a regresa Aruba mi no por a haya trabao den e ramo aki. E ora ey mi a dreña Arubus na aña 1979.

Despues di 7 luna mi a bay traha cu Cocarni, cu tabata un departamento di gobierno, y despues mi a regresa na 1982 cu Arubus unda mi ta trahando te aworaki".

NA ARUBUS

Na Arubus Frankie a cuminza como supervisor, despues el a bira hefe di supervision, a pasa pa Assistant Operation Manager, a worde promovi como Operation Manager y na October 1995, el a ser nombra Sub-director di e compania Arubus.

"Den e transcurso di 14 aña trahando na Arubus mi a experiencia hopi cambio. E crecemento di pasaheronan, e crecemento di muchanan cu ta haci uso di bus escolar, mas material, mas trahador, actualmente nos ta contando cu 114 trahado y mi ta considera Arubus parti di e famia Arubano".

Kuiperi ta sigui bisa cu e compania tin cierto contratiemponan, por ehemplo e bus station cu por fin awor nos ta spera cu pa final di aña aki e lo bin cla.

Nos a drecha e servicio di bus escolar. Awor nan a pone den circulacion busnan nobo.

"E aña escolar aki nos a haya un aumento di 250 mucha cu ta haci servicio di schoolbus. Pa dia nos ta transportando 1350 mucha".

DEPORTE

Den su hubentud Frankie Kuiperi a dedica hopi tempo na softball y despues un gran parti di su vida na mundo di karate.

"Karate tabata e deporte cu mi a gusta mas. Tabata tin

momento cu mi tabata instructor di 5 school na Aruba y un school na St. Maarten. Mi a studia karate na New York, Puerto Rico, Japon. Mi a duna varios les na St. Maarten, Venezuela, Curacao, Bonaire, Puerto Rico, Suriname.

Esaki ta nifica un dedicacion di 20 aña riba e tereno aki".

Pa 14 aña caba Frankie Kuiperi ta narrador deportivo na Voz di Aruba.

"Actualmente mi ta transmitiendo baseball tanto pa Little League como Softball, tambe tur atardi mi tin Noticia Deportivo y tur Diadomingo un Talk Show Deportivo. Door di esaki mi a dicidi di retira di Karate pasobra e tempo no ta yega pa cubri tur cos".

RECONOCIMENTONAN


Den e mundo di Karate Frankie a ricibi varios reconocimiento, y tambe den liganan di baseball y baseball, mi a haya diferente plakaat.

"DIARIO tambe a reconoce mi programa na radio, na aña 1994 durante un encuesta, como e mehor Programa Deportivo. Na December ultimo aki tambe pa 15 aña consecutivo na Canal 90, dentro di e 100 preguntanan mi a sali como e mehor comentarista deportivo ". Na muraya di mi cas mi tin un gran parti di e plakaatnan aki colga".

DEPORTE TA IMPORTANTE

"Mi ta haya cu deporte ta hopi importante pa nos hubentud, pasobra e ta sano, e ta bon pa formacion fisico y mental y di e caracter di e persona.

Mi ta haya cu na Aruba falta kader pa yuda nos hubentud ya cu tin hopi cos di haci, y



Sr. Frank Kuiperi

hopi biaha hubentud no ta dedica na dje. Mi ta kere cu ta haci falta mas informacion pa estimula nos hobennan den deporte. Haciendo deporte nos mucha por keda leu for di droga, alcohol, y otro mal vicionan".

ACTIVIDADNAN SOCIAL

Actualmente Frankie Kuiperi ta miembro di Aruba Lions y tambe miembro di "El Sol Naciente".

FAMIA

Frankie Kuiperi ta casa cu Shirley Tromp y tin un yiu muher cu yama Nashma.

"Mi ta kere cu famia ta un pilar den tur comunidad. Especialmente ora bo tin yiu. Bo dedicacion ta pa bo yiu su estudio y su futuro, y e forma con bo ta lanta bo yiu ta hopi importante, specialmente den e epoca aki. Comunicacion y confianza cu bo yiu ta hopi importante. Un relacion honesto entre yiu y mayor ta fundamental.

Ta preocupami cu den e ultimo temponan mi ta lesa den corant tanto divorcio. Esey por trece confusion den e forma di crece di mucha, y por afecta nan futuro".

Frankie Kuiperi ta yiu di Tico y Adelita Kuiperi.

Manera tur hende sa. Tico Kuiperi tin e program "Show Time" na Tele-Aruba ya pa 23 aña caba.

Frankie tin 3 ruman homber y un ruman muher. E ta conta cu apesar cu cada tin nan propio famia, nan tur ta reuni na cas di nan mayornan tur diadomingo pa desayuna.

HOBBY

Pa su mes, Frankie ta haciendo gymastiek actualmente na Stadion Nacional.

"Mi ta sinti mi mes hopi saludable. Riba fin di siman si tempo ta permiti mi ta core bicicleta y tambe traha den nos negoshi".

Esaki ta nifica cu Frankie Kuiperi ta un Arubiano cu semper tin algo pa ocupa su mente.